

zakilixut

© Olariagak



Ivan Santamaria | GASTEIZ

ATZEKOZ AURRERA

Autograforik garestiena

Estopa musika taldekoei sinadura eskatu izana argudiatu du Argomaizko ostatuak langile bat kaleratzeko

Pertsonaia ospetsuen autografo bat eskuratzearren, bada diru mordoa xahutu duen jendea. Bada, halaber, jende saldoen artean osasuna eta pazientzia arrisku bizian jarri duenik. Orain, gainera, badago lanpostua ere sinadura baten ondorioz galdu duen lagunik.

Gertakariak iragan irailean dute sorburua. Estopa musika talde ezagunak Gasteizen zuen kontzertua. Aurretik, Argomaizko ostatuan hartu zuten ostatu. Bertan bazkaltzen ari zirela, aukera hori baliatu zuen Sara Fuentek, zerbitzarietako batek, David eta Jose Manuel Muñoz anaien autografoak biltzeko. Egun horretako poza ezuste bihurtu zen hilabete eta erdira: ostatuko zuzendaritzak zerbitzaria kaleratzea erabaki zuen, Estopako musikariak «nekarazi» izanagatik.

Zur eta lur utzi zuen erabakiak Sara Fuente. Haatik, zuzendaritzaren erabakiaren atzetik bestelako motibazioa zegoela salatu du: «Nagusiak bazekien ELAko zerrendetan aurkeztu behar nintzela hauteskunde sindikaletara, eta arrazoi inozo bat bilatu zuten ni kaleratzeko». Argomaizen bederatzi urte zeramatzan lanean, azken laurak lanpostu finkoarekin. Aurretik ez zuen inolako arazorik izan.

Estopakoekin tratua «ezin hobe» izan zela gogoan du Sa-



JUANAN RUIZ / ARGAZKI PRESS

ELAko ordezkariak elkarretaratzea egin zuten atzo Gasteizko Justizia jauregiaren aurrean, Fuente kaleratu izana salatzen.

rak. «Neuk zerbitzatu beharreko mahai batean zeuden, eta, besterik gabe, ahal bazuten autografo bat sinatzeko eskatu nien. Oso ondo portatu ziren, alabarentzako eskaintza euskaraz eta guzti idatzi zuten». Ez zen izan zerbait eskatu zien pertsona bakarra. «Langile askok kontzerturako sarrerak edo argazkiak eskatu zizkieten». Haietako inor ez dute kanporatu, ordea.

Argomaizko ostatuan jende ezagun ugari izan da, eta ohikoa da haiekin tratua izatea. Sara bakkari kaleratu dute, ordea. «Horrek probatzen du atzean beste arrazoi batzuk zeudela», nabarmendu du zerbitzari ohiak. Estopakoei jazotakoaren berri eman zaie, eta gutun batean propio ukatu dute enpresaren bertsioa.

Afera epaitegietan dago orain. Lehengo lanpostura itzultzeko eskatu zuten Sararen abokatuak Justizia Jauregian atzo izandako saioan. ELAko delegatuak, gainera, elkarretaratzea egin zuten gertatutakoa salatzen, Gasteizen. Aldarte onari eusten dio, baina ezkorra da, eta ez du uste Argomaizera bueltatuko denik. Nahiko luke, arazoak arazo. «Neure lanbidea zen, eta neu eta alaba horri esker bizi ginen. Kalte-ordain bat kenduta, ez dugu ezer lortu». Estopakoenganako zaletasuna, bederen, ez diote kendu. «Akasogehiago gustatzen zaizkit orain», dio irribarretsu.



JUANAN RUIZ / ARGAZKI PRESS

Ezkerrean, Sara Fuente, ostatutik kaleratu duten langilea. Eskuinean, Estopa musika taldea.

